


E flamingo di Aruba

Hubert “Lio” Booi awe ta cumpli 90 aña

Mayan mainta e lo wordo homenagia den “Concierto Dominical”



PA hopi cu conoc'e, e ta sirbi di inspiracion inmenso.

Un artista multifacetico. Un tata ehemplar. Un Boneriano cu curason y alma Arubiano. Un Tesoro di balor inigualabel. Su aporte na nos cultura y folklore ta inmenso. Hubert Obdulio Booi, mihor conoci como “Lio”, a nace riba un fecha manera awe, 90 aña pasa, na aña 1919, den su bario di Niki-boko, Boneiro. Su infancia el a pas'e na Boneiro. Atendiendo St. Bernardus Basis School pa despues sigui su estudio den middelbare school. Desde un principio e tabata wordo educa

na skol pa e fraternan di e tempo aya. Su formacion tabata dirigi riba su posibel union na sacerdocia den futuro. Na aña 1937, cu su 18 aña, Hubert a establece su mes riba nos isla. Y desde e aña aki el a cuminsa traha na “Hollandse bank Unie”. Despues di a traha como empleado di e banco aki y como tenedo di buki, Hubert a bay traha pa Gobierno na 1959. Na principio como trahado di W.E.B y despues como hefe suplente di Oficina di Turismo y di Arubaanse Voorlichtingsdienst. Na 1963 el a bira Hefe di Oficina di Cultura y Educacion y for di

1978 te ora cu el a bai cu pensioen na 1980, el a traha como Hefe di Instituto di Cultura. Cu e puestonan aki, su pasion y participacion den varios evento cultural a crese, haciendo Hubert un personahe y promotor hopi importante di cultura Arubano. Hubert a bira co-fundador di Arubaanse Kunstkring y tabata tambe miembro di directiva di Sociedad Bolivariana. Tambe e tabata actua den diferente obra teatral. Cu grupo De Trupialen e tin un lazo masha special, ya cu e tabata organisa varios evento cu nan y tabata skirbi varios obra musical pa nan. Pues Hubert por wordo considera un Actor, Autor, Poeta, Pintor, Musico y Promotor di Cultura. Por remarca cu como Poeta, el a skirbi diferente teksto pa Padu Lampe. Union cu a crea piesanan clasico, cu ya ta parti di bida cotidiano na Aruba. E ta co-autor di nos himno nacional y ta autor di e himno di Boneiro. Su maestria no ta caba eynan. Hubert semper a impresionar tur hende como linguista. E tabata impresiona cu su conocimiento amplio y remarcable di diferente idioma. Aparte di tin amplio conocimiento di Papiamentu, Ingles, Spaño y Hulandes, e ta papia y skirbi

den Latin, Aleman y Ruso. Riba 1 di Oktober, 2003, Instituto di Cultura a reconoce Hubert Booi pa su trabou, door di dedica un placa cu su cara na su honor y a yama e patio di Instituto di Cultura – “Plaza Hubert “Lio” Booi”. Den tur su trabao, ta resalta su amor y respet pa nos idioma Papiamentu. E hecho aki ta haña reconocimiento na aña 1999, caminda cu Hubert ta ricibi e prestigioso premio literario “Cadushi di Cristal” pa su contribucion na idioma Papiamentu y su literatura. Tambe el a wordo condecora como ridder in de Orde van Oranje-Nassau. Hubert a casa cu Flora Quentina Coronel, di cual matrimonio a wordo bendiciona cu 6 yiu. 1 yiu homber y 5 yiu muhe. Lidwina, Celina, Miriam (Mia), Flora, Hubert Martinus Booi jr. y Antonieta (Neta). Mayoria artista local y internacional, den un periodo di nan carera tabata tin e honor di a traha masha di serca cu Hubert, of a yega di interpreta un di su obranan musical. Y hopi por conta storianan masha bunita y interesante di nan experiencia cu Hubert. Mayan Diadomingo, pa exactamente 11 am, ta cuminsa un concierto masha special

na honor di Hubert “Lio” Booi. The French Steakhouse na Manchebo Beach Resort & Spa lo ta anfitrión di un mainta sumamente memorabel, yena cu hopi alegria y emocion, den cua e publico presente lo tin e honor y oportunidad di felicita Hubert pa su cumpleaños, pero tambe pa por conoce e leyenda aki mas di serca. E publico, hunto cu Hubert, lo disfruta tambe di dos ora di concierto, cu un repertorio musical masha varia cu obranan di Hubert Booi. Por menciona cu Lidwina Booi, yiu muher di Hubert, ta na Aruba y lo interpreta varios piesa. Tambe algun miembro di famia Booi lo dedica presentacionnan special na Hubert. Pa 12 pm lo tin un sorpresa masha grandi, ora un orkesta y coro subi escenario pa pone enfasis riba e merito musical di señor Hubert Booi.

Entrada ta completamente gratis, pero mirando e reaccion y entusiasmo cu ya ta reinando caba, ta conseha tur hende pa yega trempan, pa por haña un bon asiento. Pues Aruba completo ta invita. Masha Pabien ta bay na Hubert “Lio” Booi y su famia cu su cumpleaños.